

Gregorijan u susretu sa predsjedavajućom Upravnog odbora Transparency International-a sa sjedištem u Berlinu: svi nivoi vlasti u BiH trebaju se baviti pitanjem korupcije



“Transparency International je od instrumentalnog značaja u borbi protiv korupcije širom svijeta i u Bosni i Hercegovini, promoviranjem vršenja dobre vlasti, odgovornosti i transparentnosti u radu javnih institucija”, rekao je prvi zamjenik visokog predstavnika Raffi Gregorian predsjedavajućoj Upravnog odbora Transparency International-a, Huguette Labelle, na sastanku održanom danas u Sarajevu.

Činjenica da je Bosna i Hercegovina i dalje najniže rangirana zemlja Zapadnog Balkana na posljednjem Indeksu percepcije korupcije koji priprema Transparency International jasan je znak da ova zemlja mora obaviti još dosta posla na iskorjenjivanju korupcije. Prvi zamjenik visokog predstavnika pohvalio je hrabrost i predanost Transparency International-a u BiH i njegove članove zbog razotkrivanja najflagrantnijih primjera zloupotrebe vlasti i korupcije u cijeloj zemlji, uključujući i Brčko Distrikt, gdje je tražio da Transparency International sarađuje sa vlastima i javnošću u rješavanju ovog pitanja. “Uprkos stalnim napadima na njegove članove i njihov vrijedan rad, TI BiH je istrajao u istraživanju i razotkrivanju slučajeva korupcije, čime je doprinio uspostavi vladavine prava na svim nivoima i u cijeloj zemlji”, izjavio

je prvi zamjenik visokog predstavnika.

Gregorijan je izrazio žaljenje što su reakcije vlasti na zaključke TI BiH često bile vrlo razočaravajuće. Umjesto da se uhvate u koštac sa otkrivenim problemima, nadležni organi su se stalno upuštali u lične napade na članove TI BiH. "Umjesto da se krivi donosilac vijesti, svi nivoi vlasti u Bosni i Hercegovini trebalo bi da rade na unapređenju vršenja vlasti, jačanju odgovornosti, jačanju transparentnosti i učešću građanskog društva u javnom životu", zaključio je prvi zamjenik visokog predstavnika.

Današnjem sastanku sa gđom Labelle prisustvovali su i Emir Đikić, predsjednik Upravnog odbora TI BiH, Srđan Blagovčanin, izvršni direktor TI BiH i Aleksandra Martinović, član Borda direktora TI BiH.